

BARCO DI BELA A PERDE BANDA DI COSTA DI ARUBA



Tabata Diadomingo, dia 15 di januari 1950 cu e barco di bela "Don Quijote" cu tabata nabegando for di Santo Domingo pa Aruba, carga cu maishi y fruta ta encontra masha mal tempo na e costa panort di Aruba.

Cu belanan gescheur y timon kibra e barco a keda ta drief sin rumbo cu diesun persona abordo. Di e diesun abordo, dies tabata tripulante y un tabata un pasahero, un tal Emilio Suarez, kende tabata un maestro di musica pa alugn tempo na Aruba.

Ora cu situacion a bira critico, cuatro tripulante a dicidi di baha den un boto di rema pa bay busca auxilio na tera. Nan tambe a keda ta drief y aunke nan a baha for di e

barco de bela for di Diadomingo, nan no a logra pa alcansa tera te Dialuna merdia. E ora nan a cuminsa cana for di Boedoei pa Santa Cruz, unda nan a reporta na warda di polis pa mas o menos 3'or di atardi.

Den preparacion pa bay duna auxilio a yega noticia cu ya tabata laat, pasobra e barco a dal contra baranca y a keda na werki.

Di e siete hombernan cu a keda abordo wardando riba auxilio, un di nan sea a hoga of a dal contra e barancanan. Polisnan a mira e culpa ta dief. E otronan a salba bulando na awa net prome cu e barco a plama riba e barancanan.

Segun e sobrevivientenan a reporta, e defunto tabata un homber di mas o menso 55 pa 60 aña di edad. Despues di a haci un inspeccion na costa, polisnan a hiba e sobrevivientenan warda unda nan a traha un reportahe completo riba e tragedia. Atencion medico no tabata necesario pasobra ningun di e sobrevivientenan a ricibi algun daño.

Nos tur sa cu nos islanan, pa mayor parti, semper a depende di comercio di afo. Nan no por a funciona sin ricibi cuminda of material for di exterior. Masha hopi barco tabata nabega for di islanan di Caribe pero specialmente Santo Domingo pa provision di cuminda pa nos islanan.

Durante e Di Dos Guerra Mundial e situacion a bira un punto di preocupacion grandi pasobra a haya sa ki intencion e Alemannan tabatin pa nos islanan, fuera di atakenan riba e refinerianan y tankeronan na februari 1942. For di documentonan nos a bin haya sa cu e Alemannan tabatin intencion pa delibita e islanan aki door di stop tur cuminda cu tabata bin for di exterior pa nos islanan. E interupcion aki tabata un di e metanan di e asaltonan di e submarinonan Nazi. Manteniendo e islanan sin un manera pa biba, probablemente lo tabatin un efecto mas devastador riba e produccion di fuel cu djis torpedeando e tankeronan. E meta final..... pa conquista nos islanan. Tabata mesun tactica cu nan a usa pa isola Inglatera y por poco nan a tuma poder na mei 1943. Tambe nos por a ripara cu despues di e inicio di e atakenan di e submarinonan riba e tankeronan na Aruba y

Corsou e atakenan aki a bira cero. Tuma por ehempel na Aruba, e submarino U-156 a torpedea SS Pedernales, SS Oranjestad dilanti di e refineria di Lago y Arkansas na waf di Eagle. Despues nan a bombardea e refineria di Lago, pero pa motibo di eror, esaki no a resulta. Despues di repente nan a bay for di Aruba. Mi por compronde cu muy probabel cu e captian Werner Hartenstein lo tabata den ansia pa haya un trato medico di von dem Borgh cu a ricibi accidente na su pia riba e submarino cu ainda a keda ta sangrando. Esaki a sosode na Martinique.

Si nos tuma e otro submarino U-502 cu a sink SS Tia Juana, Ss San Nicolas y SS Monagas banda di Macoya, Venezuela cu supuestamente mester a re-emplasa e U-

156, a drenta waf di Playa, pega riba rif y despues somenta for di Aruba. Mi pregunta ta, pakiko e no a sigui bombardea Lago su refineria?

Durante e periodo aki e guerra den Caribe tabata bay masha malo pa e aliadonan y nos por compronde e preocupacion di e gezaghebber tambe. Na fin di juni 1942 Gobernador Wouters di Corsou ta manda un telegram pa gobierno Hulandes den exilo na London. Den e mensahe e ta splica di e preocupacion tocante e situacion di provision di cuminda riba e islanan. E ta sinti cu e Comando Halto di Alemania deliberadamente a planea pa corta e provision di cuminda. Primeramente, entre februari y juni 1942 no menos cu ocho barco di carga di KNSM a wordo hundi pa e submarinonan y aki un schema tabata bisto. Despues nan a sink dos barco di carga Dominicano, Presidente Trujillo y San Rafael cu regularmente tabata nabega entre Santo Domingo y Aruba-Corsou. Anto mayor parti di cuminda, entre otro tur tipo di fruta pa islanan tabata bin for di Santo Domingo. Pa haci'e mas pio e Alemannan a cuminsa ataca e barconan di bela tambe cu tabata nebega e mesun ruta. Algun di nan tabata Sally, Gaviota, Ciudad Trujillo y Altagracia..

Si nos tuma por ehempel Sally y Gaviota cu a sali for di waf di Oranjestad, Aruba, dia 1 y 2 di juni 1942, rumbo pa Santo Domingo pero ningun a yega. Riba Sally a muri dos tripulante di Corsou, Gerardo Hecker y Julius August Muler. Riba Gaviota a muri tres di Aruba, Pedrito Dijkhoff,

Bartolo Tromp y Vernando Verhoeks. Otronan cu a muri tabata di Colombia y Santo Domingo.

Duf Kock
Escritor y Historiador